

奉詔錄卷第四

廬陵周益國文忠公集一百四十九

同邑裔孫蓮燭鐫重校刊

樞密使

衙官請給御筆

淳熙十二年八月五日係批太常寺少卿朱時敏輪對奏劄之後

此事可以措置否或用拍試便破衙官請給則每人合添支若干錢物密具奏來

回奏

臣伏準聖旨付下朱時敏奏劄理會諸軍蔭補有官子弟從軍拍試弓馬支破衙官請給令臣密具添支錢物及可以措置否臣近嘗密奏乞嚴立拍試事藝之格專待勁勇之士蓋欲收拾

人才作成士氣既備緩急亦儲將材所謂有官効用固已在其
中矣今若專放有官之人利害甚多所以自淳熙元年正月二
十八日指揮放支參部臣今畧開具下項

一紹興間諸軍多因行陣立功故有左武隊武功隊若一一
放行請給何以支吾所以不問高下止支券食錢

一有官子弟而充効用必是父祖見爲將佐稍有勢力今若
拍試放行衙官請給則主帥未必一一盡公定有請囑之
弊未能示勸先啟僥倖

一均是戰士有官而事藝高者許其拍試坐享厚俸無官而
事藝高者雖有勇力獨無榮望臣恐悅者寡而不悅者衆

矣

右三事姑陳大槩容臣以數日工夫逐旋因事密尋前後更改指揮詳究得失續具奏稟免致張皇天下豈有不可措置之事但恐思慮有所未到爾至如添支錢物若干則又係其官資官高則衙官多官卑則衙官少似難一概計算併乞睿照

時敏云殿步司止有百七十人其間事藝出衆可以應格者未必及半臣故云悅者寡而欲廣拍試之法以及諸軍

楊應龍差遣回奏

八月十四日

臣伏準聖旨付下楊應龍差遣文字恭候十六日將上稟旨伏乞睿照

胡斌居住回奏

八月二十九日

臣伏準御札付下錢良臣文字二件令擬胡斌居住指揮臣欲就今早降出錢良臣按章作勘會胡斌已降指揮降兩官放罷八月二十九日奉聖旨胡斌令隆興府居住蓋處以二浙州軍則恐良臣疑其太近江東州軍又本路惟隆興帥府得遠近之中如合聖意即便擬入其文字二件謹具繳進伏乞睿照

蔡必勝接送伴御筆

九月四日

蔡必勝人材舉止堪充接送伴等職事却緣赴上在十二月間有此相妨當作如何那融奏來

回奏

臣伏蒙聖問蔡必勝人材舉止堪充接送伴等却緣赴上在十二月間有此相妨當作如何那融臣契勘必勝闕雖在十二月若用使令不過遲赴數月自來固有闕到踰半年而赴者既見任自有太守似亦無害不然如蘄州闕止一年餘必勝若蒙親擢足爲終身之榮豈應計此年歲間闕二者更在聖裁

繳鄂州文字奏

九月八日

臣等適蒙聖問鄂州文字緣字畫太草又多塗抹兼恐或有愛憎語言過當未敢繳進既蒙宣諭謹以封入大概只是賈偉之說但稍詳備臣等所以奏乞採擇戒諭者正欲稍存事體爾若陛下先令郭棣於家書中密傳聖諭亦無不可然須將賈偉奏

劄一就付下併取進止

施行鄂軍御筆 九月九日

鄂軍之政必須先作一施行或令具析或令總領并趙雄體
究可擬指揮來然後節略二三事宣示其兄隨州信陽事亦
宜體問

回奏

臣伏準御筆鄂軍必須先作施行或令具析體究可擬指揮來
臣昨日已嘗面奏馭將恐難一律如鎮江庸駑無恥雖日加詰
問不以爲辱郭杲蓋非其比必須審而後行如總領近方敘述
其能臣前日進呈劄子是也趙雄又倚重杲見在荆南築城兼

去鄂稍遠不過差官前去徒成形迹容臣將賈偉劄子大概擬定指揮十一日進呈徑令具析似爲合宜計不爭此三兩日事未審聖意以爲然否節錄示其兄者當同將上其隨州信陽事續擬體問指揮併俟聖裁

繳進郊祀差官回奏

九月二十日

臣恭稟聖訓繳進前日已點郊祀差官文字伏乞睿照

宣示郭杲御筆

九月二十二日

朕惟將帥之道要當愛拊士卒與同甘苦故可得其死力今所聞不然貪污掊剋勞役不恤如大糴少支勒令沽酒以至請給稍厚者使掠僦賃守門回易用備陪償甚或輕人命以

事遊觀若此之類不一而足致其飢餓愁歎爲國歛怨豈朕
所以推轂分閭之意哉卿往在襄沔人多稱道之邇來言者
謂卿心迹殊異朕未欲卽以爲責然全宥之恩理不可再卿
宜悉革前弊終始如一思委寄之重服訓飭之辭以副朕懷
故茲親札想宜知悉

回奏

臣等伏蒙聖慈宣示戒諭郭杲御札仰惟淵謨獨運睿訓光昭
旣警其心迹之頓殊復告以全宥之難再恩威並用駕御合宜
臣等稽首諦觀無任欣幸之至謹此奏謝伏乞睿照

宣示郭杲劄子回奏

十月十六日

臣伏蒙聖慈宣示郭杲回奏其間如統制統領兼管酒庫及循例用軍樂水教鞦韆之類今悉住罷且多引咎之詞蓋緣陛下聖訓深切著明震懼無措自此必能悔過改圖仰副恩宥其後所指三人卽臣九月間所謂或有愛憎語言過當者是也臣記得向來曾有指揮諸軍帥不許接見過往官員士人庶幾杜絕干擾似可檢舉施行其郭杲奏劄謹復繳進伏乞睿照

軍中賣酒利害御筆

十月十七日

淮西總領自併酒庫之後於建康軍中有無利害郭杲近日賣酒比之前官利害如何朕皆未知子細可奏來

回奏

臣伏蒙聖問建康鄂州軍酒庫利害今具下項

一淮西總領所昨有酒庫軍中亦有之利害相形多寡相傾所以總領所情願抱認軍中所得利息爲供軍之費却將酒庫併入總領所自爲一家本是良策但每庫全藉監官得人方可趕辦其如吏部差注未必稱職遂畫降指揮選辟後來多緣親舊干求權要囑託所用或非其才往往有所挾持致令職業曠弛今則虧欠甚多屢聞陳乞蠲閣此在建康軍中却全無利害

一鄂州雖有酒庫利息絕少軍中七庫所入頗多然而私酒攬奪課利惟州府乃可以禁戢軍中則不能號令所以前

政利息不登消折本柄郭杲首乞禁止蓋欲易於沽賣然
每庫既委各軍兵將官督責辦集則上下觀望競欲利多
其間或有才力不逮之人日負欠數宜免科抑此所以前
官利入微而怨謗不興今日用度足而却致紛紛也

右件如前臣觀所在酒庫利息最厚況軍中所差監官及應干
使令多是軍兵不費請給又無諸司分隸錢物故其所得尤厚
於州郡而妨廢教閱士心不服亦起於此蓋披堅執銳雖曰不
易然彼不怨者知其所當爲也庫中役使未必甚勞然人反云
云者使之非其道也近日吳琚至此臣略問鎮江酒庫若付總
領所甚便只恐不容選擇監官却致敗壞琚深以爲然不肯承

當敢因聖問併敘大略其他尙須面奏

韓侂冑文字回奏

臣伏準聖旨付下韓侂冑文字一件恭俟後月初三日將上伏乞睿照

彥逾奏賈偉事御筆

十二月三日

彥逾奏賈偉事不容但已當如何施行爲適當具奏來彥逾劄子却進入

回奏

臣伏準御筆彥逾奏賈偉事不容但已當如何施行爲適當具奏來臣之愚見欲以彥逾所奏明諭三省樞密院選官一員略

加體究未審當否其元奏謹具繳進伏乞審照

乞與雷世賢轉官

十二月二十六日

臣茲聞雷世賢已遂朝辭輒有愚慮謹具奏知世賢自淳熙五年十一月除馬軍都虞候今跨涉六年兩來宿衛大禮比之江上諸帥日月最久未曾推恩若遷副指揮使則太峻不知可與遙刺或轉一官之類以示寵數否臣偶思及此欲因假日出自聖意批出故敢冒昧密啟或陛下畱俟他日立功固無不可伏聽聖裁

論權止賀正人使

一臣等竊見北牒云大宋依禮例差定使副緣此間相去地遠

天寒氣冷一行人使往同行役艱難據來歲賀正旦生辰權止一年而不明言彼此二字竊慮先辭我使以示委曲而未欲自言彼不遣使似有所待臣等採之衆論謂當令館伴就驛諭北使云彼旣念使人勤勞權止往賀之禮則彼賀正旦及生辰之使亦當權止一年如合聖意卽續擬傳諭意旨取裁

一臣等所蒙宣諭欲依例遣賀正接伴此則聖明懷遠以德非臣等所及但一行官吏頗繫事體萬一及境而彼使不來於觀聽不無疑惑臣等商量欲就淮南監司及兵官中選定接伴使副計期量遣國信所合千人三兩名往彼伺候餘人皆

可充代設或彼來固已有備若其不至亦無所損如合聖意
卽續具合行事件取裁

繳內外軍馬分屯更戍等籍

臣等昨嘗奏知欲以見今內外軍馬分屯更戍去處并諸軍所
管戰船數目編類成籍以便乙覽今各爲一冊謹具繳進乞賜
畱中仍今後每半年一次脩換進入伏取聖裁

密院使臣御筆

十二月二十九日

記得密院有一使臣隆興初曾差去軍前下文字不曾霑少
賞卿奏來

回奏

臣以積冒寒氣腰脅痛楚不能起止昨日弗獲仰望清光犬馬之情方劇瞻戀伏奉御筆記得密院有一使臣隆興初曾去軍前下文字不曾霑少賞卿奏來偶緣歲月稍深容續行契勘具奏伏乞睿照

隆興二年冬曾差密院使臣秉義郎李彪呂清賁國書等前去盱眙軍奉使處投下恐未必是

隆興初軍前幹事人奏

十二月三十日

臣連日不望清光下情無任瞻仰之至昨蒙聖問隆興初遣往軍前使臣披閱案牘除盧仲賢等外又有潘師奭曾往奉使魏杞處其餘止是差往沿邊劄探別不見得軍前下文字之人謹